



**OPĆINA KAKANJ**

*Općinski načelnik*

**MUNICIPALITY OF KAKANJ**

*Municipality Mayor*

Broj: 02/1-1338/21  
Kakanj, 03.03.2021. godine

Na osnovu člana 15. Zakona o principima lokalne samouprave u Federaciji BiH („Službene novine Federacije BiH“, broj: 49/06 i 51/09), člana 70. Zakona o organizaciji organa uprave u Federaciji BiH („Službene novine Federacije BiH“, broj: 35/05), te člana 38. Statuta Općine Kakanj („Službene novine Općine Kakanj“, broj: 4/08), a u vezi sa kriterijima Programa certifikacije gradova i općina sa povoljnim poslovnim okruženjem u Jugoistočnoj Evropi (BFC SEE), Općinski načelnik donosi:

**O D L U K U**

**o osnivanju Savjeta za privredu i ekonomski razvoj općine Kakanj**

**Član 1.**

Ovom Odlukom osniva se Savjet za privredu i ekonomski razvoj općine Kakanj (u daljem tekstu: Savjet), kao savjetodavno tijelo Općinskog načelnika za oblast ekonomske i razvojne politike općine, utvrđuju poslovi i zadaci Savjeta, sastav, broj i način izbora članova, način rada i druga pitanja od značaja za njegov rad.

Savjet se osniva u cilju zajedničkog učešća javnog, privatnog i nevladinog sektora u strateškom planiranju privrednog i ekonomskog razvoja općine Kakanj, stvaranja uslova za unapređenje privrede i poslovnog ambijenta, te razvijanja odnosa i uspostave kontinuiranog javno – privatnog dijaloga.

**Član 2.**

Savjet obavlja slijedeće poslove i aktivnosti:

- razmatranje svih pitanja koja su od interesa za privredu i ekonomski razvoj općine Kakanj;
- jačanje javno-privatnog dijaloga u cilju stvaranja što povoljnijeg poslovnog ambijenta na prostoru općine;
- predlaganje novih poduzetničkih i poslovnih aktivnosti na području općine Kakanj, te aktivnosti i mjera za kreiranje stimulativnog ambijenta za privlačenje domaćih i stranih investicija i ulaganja u projekte na području općine;
- predlaganje mjera za unapređenje poslovnog ambijenta privrednim subjektima u cilju bržeg ekonomskog razvoja općine;
- savjetodavna podrška Općinskom načelniku u odlučivanju o pitanjima iz oblasti privrede i ekonomskog razvoja;
- identifikacija i otklanjanje administrativnih i drugih barijera kojima se ometa, usporava i otežava rad privrednih subjekata;
- pokretanje inicijativa, davanje preporuka i prijedloga Općinskom načelniku, službama za upravu i drugim relevantnim institucijama u vezi pojednostavljenja, olakšavanja i ubrzavanja procedura poslovanja privrednih subjekata;
- savjetodavna podrška i učešće u pripremi, izradi i donošenju odluka od značaja za razvoj ekonomije općine, te strateških razvojnih i planskih dokumenata;
- promocija općine u zemlji i inostranstvu kao povoljnom mjestu za biznis i ulaganje;
- razmatranje i pokretanje drugih korisnih inicijativa kojima se može unaprijediti poduzetništvo i konkurentnost preduzeća, te privredni i društveni razvoj Kakanja u cjelini.